

Dalla cultura, las medias e la religiun

Danovamein ei l'jamna da focus dil gimnasi ed internat dalla claustra da Mustér stada fetg varionta. Las classas ein sefatschentadas da differents temas naven dil lungatg entochen la cultura, la religiun ed igl art, medias, film e foto.

Duas ga per onn organisescha il gimnasi dalla claustra da Mustér in'jamna da focus. Las differentas classas sefatschantan lu mintgamai da temas specials. Quei ei era stau il cass quest atun. «La finamira da quell'jamna ei mintgamai da dar in'egliada sur igl agen taglier ora, respectivamein dil menaschi ordinari dalla scola. Quell'jamna porscha la caschun da sefatschentar da temas complexs che van lunsch sur las pusseivladads dall'instrucziun ordinaria ora. L'jamna da focus vegn nezegiada era per viadis e per emprender d'enconuscher fuormas da viver jastras», di pader *Paul Tobler*, prorectur dil gimnasi a Mustér.

Ella Romandia ed il Tirol dil Sid

Era uonn ei ina part dalla sisavla classa serendida ella Romandia, quei ei bunamein daventau ina tadiziun. El center dall'jamna da focus ei staus il lungatg franzos, mo era la cultura ed igl art. La classa ei stada bia sin viadi e ha denter auter era fatg in'excusiun cun barca en Frontscha. In'otra gruppa dalla sisavla classa ei stada sin viadi el Tirol dil Sid. Denter auter ha ella visitau a Bozen igl Institut per la perscrutaziun dil lungatg (EURAC), ha visitau igl Uffeci da scola ladina a Bozen e la Scola Ladina de Fascia – in gimnasi da lungatg – sco era igl Institut Cultural Ladin «Majon di Fascegn» a Sèn Jan. Ina viseta ei era vegnida fatga alla redacziun dalla gasetta ladina «La Usc di Ladins». El center dall'jamna da focus dallas scolaras ed ils scolaras dalla tiarza classa dil gimnasi ein stai ils idioms, rumantsch grischun, la cultura e la situaziun linguistica el Grischun. Aschia ein els era stai sin viseta tier Radiotelevision Svizra Rumantscha nua ch'els han intervegniu dabia davart il diever dils idioms, respectivamein il rumantsch grischun, ellas medias.

Fontaunas, fotos e films

Las pli giuvnas scolaras ed ils pli giuvens scolaras ein i sils fastitgs da fontaunas; quei el ver senn dil plaid sco era el senn figurativ. Aschia han els visitau denter auter il menaschi d'emplir aua minerala a Val S. Pieder. La quarta classa dil gimnasi ei seprofundada ellas religiuns ed ellas perspectives d'in'otra veta. Lur jamna da focus ei stada intitulada cun «sentupadas interreligiusas e diaconia». Projects da fotos e films ein stai el center dall'jamna dalla secunda classa. Sut l'egida da fotografis professiunals han las scolaras ed ils scolaras experimentau differentas tecnicas. Auters temas centrals dall'jamna da focus al gimnasi ein stai musica da film, «Land and Environmental Art» inclusiv ina viseta dad Art Stussavgia sco era temas da teater en teoria e pratica. (cdm/fmr/hh)